

TARIKH : 29 NOVEMBER 2022
AKHBAR : BERITA HARIAN
MUKA SURAT : 4

Kerajaan baharu mampu bentang belanjawan besar, mesra rakyat

Kerajaan baharu mampu bentang belanjawan besar, mesra rakyat

Bajet 2023 bakal ambil kira impak ekonomi global, tangani kos sara hidup rakyat

Oleh Mahanum Abdul Aziz dan Zanariah Abd Mutalib
bhnews@bh.com.my

Kuala Lumpur: Kerajaan baharu masih mampu membentangkan Bajet 2023 dengan peruntukan yang besar dan mesra rakyat bagi menangani isu kos sara hidup serta menyokong perniagaan. Ia boleh disediakan dengan melaksanakan konsep pengurusan yang lebih cekap dan berhemah dari segi perbelanjaan serta memastikan sebarang peruntukan tambahan dapat dipadankan dengan hasil tambahan atau penjimatan perbelanjaan lain yang tidak diperlukan.

Pada masa sama, penganalisis dan ahli ekonomi berpendapat, Bajet 2023 yang bakal dibentangkan semula bulan depan di bawah pentadbiran Perdana Menteri, Datuk Seri Anwar Ibrahim perlu mengambil kira dua pertimbangan utama, iaitu langkah mengimbangi impak kelemahan ekonomi global ke atas ekonomi rakyat, terutama menangani isu

kos sara hidup dan pembaharuan bagi mengukuhkan asas ekonomi.

Affin Hwang Investment Bank dalam nota penyelidikannya semalam berkata, kerajaan masih boleh membentangkan bajet yang mesra rakyat dengan bantuan tunai diteruskan untuk kumpulan yang memerlukan.

Bank pelaburan itu turut percaya, sebarang pengenalan sistem subsidi bahan api bersasar hanya akan dilakukan secara beransur-ansur dan pada kadar yang terukur.

"Apa yang penting ia tidak membebankan kumpulan berpendapatan rendah berikutan kesan pengurangan subsidi dalam kos sara hidup mereka.

"Dalam menyediakan Bajet 2023 yang baharu, kami percaya kerajaan yang baharu tetap akan membentangkan bajet yang 'murah hati' dan mesra rakyat.

"Perhatian boleh diberikan kepada isu peningkatan kos sara hidup dan pada masa sama menyediakan insentif seperti bantuan tunai yang akan membantu menyokong penggunaan swasta," katanya.

Belanjawan mini 19 Disember

Anwar pada sidang media pertamanya sebaik dilantik sebagai Perdana Menteri Ke-10, Khamis lalu, berkata kerajaan akan membentangkan rang undang-undang (RUU) belanjawan mini pada 19 Disember depan bagi meluluskan emolument berkaitan belanja me-

ngurus kerajaan, khususnya gaji penjawat awam.

Kelulusan emolument itu penting bagi memastikan tiada keimbangan dalam kalangan penjawat awam berhubung gaji, berikutan Bajet 2023 masih belum diluluskan.

Sebelum ini, bekas Menteri Kewangan di bawah pimpinan kerajaan lalu, Tengku Datuk Seri Zafrul Abdul Aziz, membentangkan Bajet 2023 pada 7 Oktober lalu di Dewan Rakyat.

Bagaimanapun, bajet itu tidak sempat dibahas dan dituluskan selepas Perdana Menteri ketika itu, Datuk Seri Ismail Sabri Yaakob mengemukakan pembubaran Parlimen, 10 Oktober lalu.

Penganalisis Ekonomi Putra Business School, Prof Madya Dr Ahmed Razman Abdul Latiff pula berpendapat, seelok-eloknya kerajaan membentangkan bajet mini seperti pada 1999 pada sidang Parlimen, Disember ini.

Beliau berkata, ia bagi memastikan perbelanjaan penting diluluskan terlebih dahulu, termasuk subsidi dan bantuan kelangsungan hidup rakyat.

"Ia memandangkan Kerajaan Perpaduan harus mengambil kira semua manifesto parti yang bertanding yang membentuk Kerajaan Perpaduan ini dan menga-

daptasi inisiatif yang terbaik dari setiap manifesto ke dalam Bajet 2023 yang berkemungkinan akan dibentangkan pada Januari atau Februari nanti.

"Keutamaan yang perlu diberi masih lagi berkenaan isu kos sara

hidup yang meningkat, kenaikan harga barangan, gaji yang lebih kompetitif, peluang pekerjaan yang lebih baik, peluang untuk perniagaan mengembangkan perniagaan masing-masing di samping mengurangkan kos operasi merangkumi kos bil elektrik, kos pembiayaan dan sebagainya," katanya.

Berkongsi pendapat sama, penganalisis ekonomi, Prof Madya Dr Mohd Yusof Saari berkata walaupun kerajaan baharu dilihat akan memberi penekanan kepada langkah penjimatan, namun ia perlu dilaksanakan secara berhati-hati supaya tidak memberi kesan sampingan kepada ekonomi.

Rangsang ekonomi domestik

Mohd Yusof yang juga Ketua Ekonomi Buruh merangkap penasihat menteri di Kementerian Sumber Manusia dan Emiratisasi, berkata di bawah Bajet 2023 nanti, kerajaan perlu membelanjakan untuk memastikan ekonomi domes-

tik terus bergerak, namun perlu efektif dan memberi impak pengandaan kepada pertumbuhan ekonomi serta rakyat.

"Bagi memastikan kita membina semula asas ekonomi kita, perubahan struktur dan reformasi bersesuaian perlu dilakukan supaya ekonomi kita kalis krisis. "Sebagai contoh transformasi dan reformasi, negara perlu memberi fokus kepada pengeluaran makanan yang kukuh kerana kemelesetan ekonomi dunia terbukti memberi impak besar kepada harga makanan, jadi sekurangnya kita boleh bertahan di masa akan datang jika berlaku krisis," katanya.

Mohd Yusof berkata, Bajet 2023 juga disaran sebagai bajet pengembangan, yang mana perbelanjaan oleh kerajaan amat perlu untuk suntikan ekonomi domestik.

"Perbelanjaan diperlukan tapi kita perlu lihat perbelanjaan yang bagaimana. Kita mahu perbelanjaan yang boleh menjana peluang pekerjaan dan melonjakkan pendapatan.

"Penjimatan itu perlu tapi ia harus dilakukan secara berhati-hati. Kita tidak mahu penjimatan itu mungkin beri kesan sampingan kepada ekonomi.

"Sebagai contoh, pada pentadbiran lalu, mereka mengurangkan perbelanjaan yang mengakibatkan penciptaan pekerjaan oleh sektor swasta menurun," katanya.



Ahmed Razman